

UVODNA RIJEČ

EDITORIAL

Gotovo da nema branše na koju se tokom 2020. godine nije negativno odrazila pandemija bolesti Covid-19. U tom smislu izuzetak ne predstavljaju ni subjekti iz područja geodezije i geoinformatike. Posljedice pandemije su se od sredine marta ove godine itekako osjetile u cjelokupnoj geodetskoj struci u Bosni i Hercegovini. Geodetske firme i katastarski uredi suočili su se sa otežanim uslovima rada u uredima i na terenu zbog donesenih epidemioloških mjera, a brojni dogovoreni i planirani poslovi i projekti morali su biti otkazani. Javna sredstva planirana za projekte u kojima sudjeluje geodetska struka osjetno su umanjena rebalansima budžeta, a državna finansijska pomoć privredi zaobišla je geodetski sektor. U takvim uslovima značajno smanjenih prihoda, mnoge kompanije su se našle pred izazovima kako zadržati radna mjesta i osigurati uslove za nastavak poslovanja. Dio uposlenika je upućen na godišnji odmor, dio na čekanje, a određeni broj ih je nažalost morao biti otpušten. Pandemija se negativno odrazila i na geodetski obrazovni sektor, obzirom da su srednje škole i fakulteti bili prisiljeni potpuno reorganizovati nastavni proces i praktično preko noći prebaciti se na e-učenje, nastavu na daljinu i digitalne platforme. Otkazani su i svi stručni skupovi, manifestacije i druga okupljanja. Veliki broj geodetskih stručnjaka u BiH zarazio se koronavirusom, a mnoge kolegice i kolege imali su ozbiljne simptome i komplikacije. Nažalost, neki od njih su izgubili bitku za život sa ovom bolešću. Tužna vijest o smrti prof. dr. Asima Bilajbegovića duboko je potresla mnogobrojne poštovaoce njegovog značajnog naučnog, nastavnog i stručnog djelovanja. Puno toga se može napisati o njegovom bogatom i razgranatom radu, izuzetnoj ljudskoj snazi i vrlinama, a ovdje ćemo samo spomenuti njegovo dugogodišnje članstvo u Uredničkom odboru Geodetskog glasnika. Svijetla uspomena na uvaženog profesora Bilajbegovića, visokog uzora geodetskih stručnjaka, nikada neće izbljediti.

Usprkos svim nedaćama koje je donijela 2020. godina, bosanskohercegovački geodeti su vlastitom snagom, voljom i domišljatošću uspijevali postići zadivljujuće rezultate u svom radu. Možda najbolji primjer predstavlja realizacija projekta mreže nivelmana visoke tačnosti NVT III, u kojoj su tokom ove godine obavljena mjerenja nivelmanskih vlakova ukupne dužine oko 1800 km. Dosta se radilo i na izradi temeljne topografske baze podataka, komasacijama, harmonizaciji katastarskih i zemljišnoknjižnih podataka, uspostavi baze podataka katastra nekretnina, gravimetrijskim mjerenjima, realizaciji velikih građevinskih projekata i sl.

U 2020. godini izostala je podrška u vidu finansijske pomoći koju Federalno ministarstvo obrazovanja i nauke dodjeljuje izdavačima naučnih časopisa. Kroz izmjene i dopune Budžeta za 2020. godinu otkazano je finansiranje svih programa i projekata iz oblasti nauke od značaja za FBiH. Zbog te odluke došlo je u pitanje i izdavanje ovog broja Geodetskog glasnika. Kako je poznato, Federalno ministarstvo obrazovanja i nauke je u prethodnim godinama pružalo veliku pomoć našem časopisu, obezbjeđujući najveći dio sredstava za njegovo štampanje. Iako direktno pogođene negativnim ekonomskim posljedicama pandemije Covid-19, u pomoć Geodetskom glasniku priskočile su mnoge domaće kompanije. Zahvaljujući direktnoj finansijskoj podršci firmi Geobiro Konjic, Zedis Zenica, GIS Soft Biljeljina, AMG Visoko, Geodet Sarajevo, IT Systems Sarajevo i GeoWild Sarajevo, omogućeno je da svjetlo dana ugleda ovaj broj časopisa. Iskreno zahvaljujemo spomenutim kompanijama, kao i svim autorima objavljenih priloga i recenzentima, jer bez njihovog rada i truda Geodetskog glasnika ne bi bilo. Želimo vam ugodno čitanje i sve kolegice i kolege pozivamo da nam se pridruže u stvaranju sljedećih brojeva našeg časopisa.

Nedim Tuno